

Abkommen zwischen Stephan Klocker, Official in Wien, und Vadian.

Wien. 1516. December 10.

Anno domini etc. im fünffzehnhundertisten und sechtzehenden, den zehenden tag Decembris, haben der erwidrig, hochgelert her doctor Stephan Klogkher, thuembdechant zu Laibach unnd der zeit official zu Wienn, anstat des hochwirdigen fursten und herren herren Georgen, bischove zu Wienn, an ainem und der hochgelert herr maister Joachim Watter, collegiat etc., der zeit der hochlöblichen schuel und universitet zu Wienn rector, für sich unnd anstat gedachter gemainer universitet anders tails, gütlich bewilligt unnd sich veraint: nämlich das der edl, vesst Romisch kayserl. Maj. etc. rat saltzamtman in Osterreich unnd phleger zu Eberstorff, her Hanns Oeder, als irer Majestet in disem fall verordneter commissari, soll und mug alles und yedes verlassen guet weilendt maister Andre Rosmullner, priesters und beneficiat zu Wienn,

so neulich mit tod verschaiden, nach lautt aines codicill mit desselben maister Andre aigen hanndt geschriben, exequiern und austailen, doch beden vorgenannten partheyen unvergriffen an iren rechten und gerechtighaiten, darinn sy noch gegen einander vor gedachter Kayserlicher Majestet unenndtschieden steen, treulich unnd ungeferlich. Mit urkundt diser verainigungzedl mit vorbenannter herren official unnd rector aigen hannden unnderscriben.

Actum in Sanndt Steffans allerheiligen thuembkirchen zu Wienn, am jar, tag, monat wie oben begriffenn.

Stephanus Clocker, officialis Viennensis,
manu propria subscripsit.